

# 保定府志

第二十一冊  
仕績二明

卷五十二至五十四

保定府志卷五十二

列傳六

仕績三

武略分見

明起洪武迄天順

李浩清苑人洪武初爲松江府同知均賦役平出納愼興革嚴

關津清獄訟時稱循吏未幾召置機近

舊志

張居敬保定人洪武初知武康公正廉平吏民畏服

浙江通志

武彖慶都人洪武初以博洽賜侍讀三年魏國公奏令訓敬諸

王時成祖在潛邸每與討論講史二十年始歸永樂元年徵授

侍讀學士以老乞休賜敕以贈其行有博通六藝貫徹五經允

儒林之碩望誠國家之耆龜等語

康熙畿輔通志

何禮清苑人洪武初以才行卓異舉用厯任勤能物論推重累

官兵部尚書

舊志

奏言廣東廣西福建浙江湖廣江西淮安蘇州

等處徵收馬草及支放馬料宜除各衛年老殘疾軍士宜準其

擇丁更代管軍官拘留者宜按治皆允行又請令天下衛所於

農隙時選善射者更番赴京校試中者賞鈔五錠連中者十錠

不中者罰其指揮千百戶上亦嘉納尋以事免官

分省人物考

薛大昉蠡縣人洪武四年進士任翼城縣丞以清慎得民尤盡

心學校延元翰林李炳奎掌教士習丕變居翼城凡十年擢御

史累遷布政使祀名宦

山西通志

陳振之肯堂孫

肯堂傳見前

洪武九年以薦舉任本縣訓導教人有

法陞浙江龍泉知縣志潔操貞民深感服任滿囊橐蕭然當時

以廉吏稱

滿城縣志

李原名

分省人物考及舊志均作李彥名

字資善安州人洪武十五年以通經

儒士舉爲御史二十年使平緬歸言思倫發懷詐窺伺宜嚴邊  
備靖江王以大理印行令旨非法爲遠人所輕稱旨擢禮部尙  
書自是遠方之事多咨之高麗奏遼東文高和定州皆其國舊  
壤乞就鐵嶺屯戍原名言數州皆入元版圖屬於遼高麗地以  
鴨綠江爲界今鐵嶺已置衛不宜復有陳請帝命諭其國守分  
土無生豐安南歲貢方物帝念其勞民原名以帝意諭之令三  
年一貢自是爲定制又以帝命行養老之政中明府州縣歲貢  
多寡之數定官民巾服之式皆著爲令初以答祿與權言建歷  
代帝王廟至是原名請以風后力牧等三十六人侑享帝去趙  
普安童阿朮而增陳平馮異潘夫木華黎餘悉如舊原名奏魯  
王薨定喪服之制進士王希曾請喪出母原名謂非禮宜禁凡  
郊祀宗廟社稷嶽瀆諸制先後儒臣論定時有詳略帝悉令原



名更正之二十三年以老致仕

明史

賈大剛字德中滿城人洪武間以講論治道舉進士聽宣諭應對有殺者儆衆不殺者安衆之語一時傳誦授廣東參政陞布

政使

舊志

劉觀雄縣人洪武十八年進士授太谷縣丞召拜監察御史署

左僉都御史出爲嘉興知府

舊志

有囚罪當死於掌中書黃金二

千乘鞠訊時屢伸手示觀截其手以進遂蒙眷注

分省人物考

尋丁

父憂永樂元年擢雲南按察使未行拜戶部右侍郎二年調左

副都御史四年奉命採木浙江未幾還明年冬帝以山西旱命

觀馳傳往散遣採木軍民六年擢禮部尙書呂震易官坐事爲

皇太子譴謫帝在北京聞之以大臣不宜遽折辱特賜書諭太

子八年贊都督僉事費璫討涼州叛羌遠坐事謫本部吏十三

年還職改左都御史十五年督浚漕河十九年命巡撫陝西仁  
宗嗣位兼太子賓客旋加太子少保給雙俸大理少卿弋謙以  
言事忤上意尙書呂震大理卿呂謙希旨奏劾觀復令十三道  
御史論其矯誣以是爲輿論所鄙宣德初朝臣以奢相尙歌妓  
滿前觀私納賄賂而諸御史亦貪縱無忌帝乃出觀視河道御  
史張循理等交章劾觀並其子輻諸賊污不法事帝怒逮觀父  
予以彈章示之觀疏辯帝益怒下錦衣衛獄明年謫輻戍遼東  
而命觀往觀竟客死

明史

邱鵬唐縣人洪武二十一年進士擢御史知無不言言無不當  
後得罪籍其家止木起二張木筯五雙皆鄉物也上嘉其清復  
授廣東按察使卒祀鄉賢

康熙通志

劉知微清苑人洪武中爲禮部侍郎凡有建白悉見採納使安

南卒國王以銀棺歛之喪歸予葬祭

舊志參雍正通志

韓傑滿城人洪武中以孝廉授浙江吉安主簿城守有功歷陞

兩浙鹽運使祀鄉賢

舊志

孟常字白經滿城人窮經致用以舉人授懷甯縣尹精明練達

吏畏民懷調山陽卓有政聲擢江西道監察御史彈劾不避權

幸人咸推重之

舊志

高嗣興唐縣人洪武中以秀才上疏陳王道及官民利病太祖

嘉獎擢兵部主事累官至尙書

同上

朱江唐縣人洪武中以人才薦官祁縣廉慎有爲遷御史復出

爲知府

山西通志

陰煜容城人洪武間爲聞喜令以廉幹稱

山西通志

王寅高陽人洪武間以明經薦爲洛陽訓導又以經明行修授

禮科給事中以敢言忤權要出爲思州知府宣布德威蠻夷歛

戢

舊志參分  
省人物考

楊紹新安人洪武時鄉貢任刑部主事用法清簡冤滯多伸歷

官陝西參議

舊志

楊立新安人洪武時鄉貢任戶部郎中出納惟均陞陝西參政

同上

王庸新安人洪武時鄉貢任刑部主事剖決如流事無壅遏陞

太原知府

同上

王端唐縣人洪武時貢生學行純篤授南康知府威惠公明吏

民感戴

唐縣志

王坦祁州人洪武時胄監授兵科給事中彈劾不避權要直聲

大著

舊志



翟整字文整滿城人洪武時以城守有功授本縣尹永樂元年除大名府南樂令明敏果斷吏畏民懷秩滿里老保留在任九年有古循良之風

薛郁清苑人洪武間國子生歷官有守累陞陝西左布政使

黃宏新城舉人洪武末知常州性寬厚吏民愛戴增飾學校作新士類以循良稱祀常州名宦祠

劉源字本清滿城人洪武末以茂才薦除汝甯府經歷明敏果確有豪強犯法源如律按治郡守爲緩頰源厲聲面折守恚竟備他事中傷之賴臺司力白其誣遂解組

俱同上

王玘安肅人洪武末官浙江按察司僉事振肅風紀咨詢民瘼

有聲於時

浙江通志

李友直字居正清苑人讀書通太義兼習律法靖難初時以首

發密事擢北平布政司參議永樂紀年建北京設行部除左侍郎以事謫戍尋復官綜理沿河輸運諸務利興害去人咸德之調行在工部署兵部事成祖崩友直以居喪不謹降順天府丞尋陞工部右侍郎遷尙書改北京行部奉命代祀秦中前代陵寢還朝懇以軍民利害爲言宣宗繼統改行在工部命往西蜀董夫匠鳩工料材軍民稱便英宗臨御敕繕葺京倉濬通濟等河規畫裕如正統三年以疾卒

分省人物考

趙豫字定素安肅人燕王起兵下定保定豫以諸生督賦守城永樂五年授泌陽主簿未上擢兵部主事進員外郎內艱起復洪熙時進郎中宣德五年五月簡廷臣九人爲知府豫得松江奉敕往時衛軍恣橫豫執其尤者杖而配之邊衆帖然一意拊循與民休息擇良家子謹厚者爲吏訓以禮法均徭省費減吏

員十之五巡撫周忱有所建置必與豫議及清軍御史李立至專務益軍餉及姻戚同姓稍辨則酷刑榜掠人情大擾訴枉者至一千一百餘人鹽司句竈丁亦累及他戶大爲民害豫皆上章極論之咸獲蘇息有詔減蘇松官田重租豫所轄華亭上海二縣減去十之二三正統中九載考績民五千餘人列狀乞留巡按御史以聞命增一秩還任及十年春大計羣吏始舉卓異之典豫與甯國知府袁旭皆預焉賜宴及襲衣遣還在職十五年清靜如一日去郡老穉攀轅留一履以識遺愛後配享周忱祠方豫始至患民俗多訟訟者至輒好言諭之曰明日來衆皆笑之有松江太守明日來之謠及訟者踰宿忿漸平或被勸阻多止不訟以愷悌稱

明史

楊澤定興人起戎行有勇略以靖難功累陞山西都指揮僉事

永樂中北征有功陞右軍都督僉事洪熙元年加都督同知

舊志

郭璉字時用初名進新安人永樂初以太學生擢戶部主事

明史

以勤敏著任福建山東參政

分省人物考

歷官吏部左右侍郎仁宗

卽位命兼詹事府少詹事更名璉宣宗初掌行在詹事府吏部

尙書蹇義老綴部務帝欲以璉代璉厚重勤敏然寡學術楊士

奇言恐璉不足當之宜妙擇大臣通經術知古今者帝乃止踰

年卒爲尙書論以呂蒙正夾袋虞允文材館錄故事璉由是留

意人才識進士李賢輔相器授吏部主事後果爲名相時外官

九年考滿部民走闕下乞留輒增秩復任璉慮有妄者請覈實

從之璉雖長六卿然望輕又政歸內閣自布政使至知府闕聽

京官三品以上薦舉旣又命御史知縣皆聽京官五品以上薦

舉要職選擢皆不關吏部正統初左通政陳恭言古者擇任庶

仕績明

官悉由選部職任專而事體一今令朝臣各舉所知恐開私謁之門長奔競之風乞杜絕令歸一下吏部議璡遜謝不敢當事遂寢正統六年御史曹恭以災異請罷大臣不職者帝命科道官參議璡及尙書吳中侍郎李庸等被劾者二十人璡等自陳乃致仕

明史

劉穆蠡縣人永樂乙酉舉人官給事中以強諫忤旨擬辟姪敬年未弱冠擊登聞鼓言穆無後願以身代上嘉其義赦復其官

雍正通志

王驥字尙德東鹿人長身偉幹便騎射剛毅有膽曉暢戎略中永樂四年進士爲兵科給事中使山西奏免鹽池逋課二十餘萬尋遷山西按察司副使洪熙元年入爲順天府尹宣德初擢兵部右侍郎代顧佐署都察院久之署兵部尙書九年命爲眞

正統元年春詔議邊事越五日未奏帝怒執驥與侍郎鄺埜下之獄尋得釋阿台朶兒只伯數寇甘涼邊將屢失利侍郎柴車徐晞都御史曹翼相繼經理務未能制二年五月命驥往許便宜行事驥疾驅至軍大會諸將問往時追敵魚兒海子先退敗軍者誰僉曰都指揮安敬驥先承密旨戮敬遂縛敬斬轅門并宣敕責都督蔣貴諸將皆股慄驥乃大閱將士分兵畫地使各自防禦邊境肅然閱軍甘涼汰三之一定更番法兵得休息而轉輸亦省俄阿台復入寇帝以任禮爲平羌將軍蔣貴趙安爲副驥督軍三年春偕諸將出塞以貴爲前鋒而自與任禮帥大軍後繼與貴約曰不捷無相見也貴擊敵石城敵走兀魯乃貴帥輕騎二千五百人出鎮夷間道兼行三日夜及之擒左丞脫羅斬首三百餘獲金銀印各一駝馬兵甲千計驥與禮自梧桐



林至亦集乃擒樞密同知僉院十五人萬戶二人降其部落窮進至黑泉而趙安等出昌甯至刁力溝亦擒右丞達魯花赤三十人分道夾擊轉戰千餘里朶兒只伯遠遁論功貴禮皆封伯而驥兼大理卿支二俸尋召還理部事久之麓川宣慰使思任發叛數敗王師黔國公沐晟討之不利道卒六年正月驥總督軍務大發東南諸道兵十五萬討之瀕行賜驥貴金兜牟細鎧蟒繡緋衣朱弓矢驥請得以便宜從事馳傳至雲南部署諸將遣參將冉保由東路趨孟定大軍由中路至騰衝分道夾擊自將中軍奮擊之賊大潰乘勝至馬鞍山踰月抵賊巢賊更自間道立柵馬鞍山出大軍後驥戒軍中無動而令都指揮方瑛以六千人突賊寨斬首數百復誘敗其象陣驥乃督諸將環攻其七門積薪縱火風大作賊焚死無算溺江死者數萬人思任發

攜二子走孟養獲其虎符金牌宣慰司印及所掠騰衝諸衛所  
印章三十有奇犁其巢穴留兵守之而還封推誠宣力武臣特  
進榮祿大夫上柱國靖遠伯歲祿千二百石世襲指揮同知思  
任發之竄緬甸也其子思機發復帥餘衆居者藍乞入朝謝罪  
廷議因而撫之王振不可是年八月復命驥總督雲南軍務帥  
參將冉保毛福壽以往且敕驥圖緬甸是年冬大軍逼緬甸緬  
人以樓船載思任發覘官軍而潛以他舟載之歸明年召還加  
祿三百石命與都御史陳鎰巡延綏甯夏甘肅諸邊當是時緬  
人已以思任發來獻而思機發竊駐孟養地十三年春復命驥  
總督軍務宮聚爲平蠻將軍帥師十五萬人往明年造舟浮金  
沙江蠻人柵西岸拒守官軍聯舟爲浮橋以濟拔其柵進破鬼  
哭山連下十餘寨墜溺死者無算而思機發終脫去不可得是

時官軍踰孟養至孟邨海地在金沙江西去麓川千里自古兵力所不至諸蠻見大軍皆震怖驥度賊終不可滅乃與思陸約立石表誓金沙江上曰石爛江枯爾乃得度遂班師凡三征麓川卒不得思機發議者咎驥等老師費財以一隅騷動天下而會川衛訓導詹英抗疏劾之奏下法司得不問景泰三年四月賜敕解任奉朝請驥年七十餘躍馬食肉盛聲伎如故久之石亨徐有貞等奉英宗復辟驥與謀賞稍後上章自訟言臣子祥入南城爲諸將所擠墮地幾死今論功不及疑有蔽之者帝乃官祥指揮僉事而命驥仍兵部尙書理部事加號奉天翊衛推誠宣刀守正文臣光祿大夫餘如故數月請老又三年乃卒年八十三贈靖遠侯諡忠毅傳子瑞及孫添添尙嘉善長公主再傳至孫瑾嘉靖初提督三千營協守南京還掌左府久之佩征